

Kalaallit Nunatsinni oqaatsit pisortatigoortut innuttaasunit kalaallisut oqaaseqanngitsunit ilinniarneqarsinnaanngoqqullugit ilinniutitigut siuarsaasoqarnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.

(Inatsisartuni ilaasortaq Aleqa Hammond, Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Naalakkersuisut sinnerlugit Inatsisartunut ilaasortaq Aleqa Hammond, Siumut, qutsavigaara oqaatsit pisortatigoortut innuttaasunit kalaallisut oqaaseqanngitsunit ilinniarneqarsinnaanngoqqullugit ilinniutitigut siuarsaasoqarnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuutaanut.

Naalakkersuisut siunnersuuteqartoq isumaqatigaat, pingaartumik inersimasunut oqaatsitsinnik ilinniarusuttunut atortut ullutsinnut naleqquttut amigaataasut. Oqaatsitsinnik ilinniarusuttut amerlasuut akuttunngitsumik oqaatigisarpaat atortut imminut ilinniartinnissamut imaluunniit kommunit sunngiffimmi ilinniartitsineranni atorneqarsinnaasut naleqquttut nassaariuminaatsuusartut.

Oqaatsinik Pikkorissarfik oqaatsit pillugit apeqqutinik qitiusumik ilisimasaqarfittut atuunnissamut aningaasaliiffigineqartarpoq, tassunga ilanngullugit pikkorissartitsinernut aammalu oqaatsinik ilinniartitsinermi atortunik ineriartortitsinissamut. Pisussaaffik taanna ataavartumik nalilersorneqartarpoq aammalu inuaqatigiinni suliffeqarfinnilu pisariaqartitat malillugit aaqqiivigineqartarluni.

Oqaatsinik Pikkorissarfik taamaalilluni ukuninnga inersimasunik ilinniartitsinermi atortunik ineriartortitsereernikuuvoq: Qallunaatut, tuluttut, kalaallisut allat oqaasiit, aammalu taamatut ilinniartunut qarasaasiakkut ilinniarnermi atortut. Atortut taakku tamanit pissarsiarineqarsinnaapput.

Namminersorluni Oqartussaanerup 21. juni 2009-mi atuutilersineqarnera kinguneqarpoq inuusuttut inersimasullu amerlanerit kalaallisut allat oqaasiit pikkorissarusulernerannik. Taamatut kissaateqarneq Naalakkersuisut 7. april 2010-mi oqaatsit pillugit isumasioqatigiissitsineranni aamma oqaatigineqarpoq. Isumasioqatigiinnermi suliaqarnermi suleqatigiit arlallit oqaatigaat pingaartumik kalaallisut allat oqaasiit ilinniagaqarnermi atortunik amerlanerusunik ineriartortitsinissaq pisariaqalertussaasoq. 2011-mut Inatsisartut Aningaasanut Inatsisissaattut Siunnersuutip suliarineqarneranut atatillugu atortut ineriartortinneqarnissaasa aammalu oqaatsinik ilinniartitsinermi ilinniartitsisut pisinnaasaasa ineriartortinneqarnissaasa salliutinneqarnissaannut periarfissat Naalakkersuisut misissorniarpaat.

Naalakkersuisut inassuteqaatigaat Nunatsinni oqaatsit pisortatigoortut innuttaasunit kalaallisut oqaaseqanngitsunit ilinniarneqarsinnaanngoqqullugit ilinniutitigut siuarsaasoqarnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut akuerineqassasoq.

